

■ OR DA LA VITA DA LUDMILLA CAHENZLI

L'emprima e la davosa petta per la scola

54 pettas fa ina buna mamma da trais uffants durant il temp da scola primara. Jau, Ludmilla Cahenzli, na sun betg ina buna mamma. Mia figlia pitschna ha finì l'emna passada la sisavla classa ed jau hai fatg per l'emprima giada ina petta per la scola. Ussa stun jau mal ch'jau n'hai betg fatg dapli pettas. Pertge ch'jau hai chattà or il tric.


Entaifer in onn da scola survegnan ils geniturs invits in suenter l'auter: l'invit per la saira da geniturs, l'invit a l'orientaziun davart l'instrucziun sexuala, l'invit a l'orientaziun davart l'emprima communium, l'invit per vegnir a gidar il di da sport, etc. Giudim ils cedels d'invitaziun hai in talun ch'è d'emplenir or e da returnar a la scolasta. Cun il talun na fan ins betg palais, sch'ins prenda part a l'occurrenza. Anzi, sin il talun stat scrit: «Tgenina mamma fiss pronta da far ina buna petta e purtar en scola?» La mamma po far ina crusch en in quadret e signalisar uschia ch'ella fetschia gugent ina petta.

Insaco m'ha questa crusch adina regurdà als Indians che suttascrivevan pli baud cun cruschs. Ma il motiv principal ch'jau n'hai mai fatg ina crusch vegn da mes patratgar emancipatoric: las mammas han ussa 2000 onns fatg pettas, uss èn ils babs vidlonder. Quest patratgar vegn rinforzà d'ina marschadetgna profunda che correspunda a mes character natiral.

Mes uffants han adina batlegià ch'jau fetschia er ina petta. La figlia gronda ha schizunt ina giada bragì e ditg: «Tuttas mammas fan pettas, mo ti betg.»

«Scheuttas mammas portan pettas en scola, hai soviso memia bleras», è stada mia resposta.

Avant trais emnas ha mia figlia pitschna purtà a chasa l'invit per la finiziun



ILLUSTRATURA
YVONNE GIENAL
WWW.YVONNE-GIENAL.CH

da la sisavla classa. Ella ha be mess sin maisa-cuschina il cedel e gnanca dumandà, sch'jau fetschia ina petta. Jau hai legì l'invitaziun, prendì il culli, fatg ina crusch, taglià or il talun e purtà el a mia figlia en chombra. «Quel pos dar a la scolasta.»

«Ti fas ina petta?», ha ella dumandà e m'ha guardà cun in'egliada sceptica.

«Cler.»

«Sas ti insumma far pettas?»

Buna dumonda, hai jau pensà e respundì cun tun datschert: «Cler.»

«Tge petta fas?»

«Forsa ina da riablas.»

Mia figlia ha mess il talun en il satgados e ditg nagut.

Jau sun ida en cuschina a tschertgar il recept per la petta da carottas. El n'era nagliur.

Probabel è'l giu en tschaler en la stgatla da bananas ch'jau n'hai betg pachetà ora dapi che nus essan vegnids qua avant diesch onns. Tge far? Jau pudess gea simpelmain cumprà ina petta tar il pasterner. Lez sto la finala era viver. Scheuttas mammas faschessan sezzas las pettas, gies

il pauper pasterner anc bancrut. Da l'autra vart vesi ora coga mal, sch'jau vegn cun ina petta dal pasterner. Lezzas èn uschè perfetgas e memia perfetga na dastga ina petta fatga sez gea betg esser.

Suenter lungas ponderaziuns m'è vegnì endament ch'i dat «Backmischungen». Cun quellas vegn schizunt jau da far ina buna petta.

Jau sun pelegrinada en il migros e davant il regal da spezarias ed ingredienzas m'è ida si ina glisch. «Schokoladencake», «Zitronencake», «Rüebli torte», «Tirolercake», etc. steva scrit sin ils pacs cun las maschaidas.

Quai è gea las pettas ch'jau hai mangià ils ultims onns a las sairadas da geniturs! Sch'jau avess savì quai!

Jau hai cumprà in pac «Tirolercake», perquai ch'jau al hai il pli gugent. A chasa durant che la petta è stada en furnel, hai jau quintà ora quantas pettas ch'jau avess pudì far, sch'jau avess adina fatg ina crusch sin il talun. Mia calculaziun: durant in onn da scola datti en media trais taluns da petta per mintga sclar. Sch'ins ha trais uffants, fa quai nov pettas l'onn. Durant la scola primara, pia durant la fasa chauda da pettas – en scola secundara svanescha quest fenomen – faschess quai 54 pettas.

Cura ch'jau hai springì il zutger en pulvra sin il «Tirolercake» ch'era mo levet nair, hai jau deplorà d'avair fatg en tut quels onns mo ina suletta crusch. Igl è gea uschè simpel da far pettas. Jau avess schizunt pudì laschar far ellas mes Eugen.

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria